



慾望

以早，咱閩南語應該較少有人咧講「慾望」這個詞，這大概是因為向時踮臺灣，若食穿攏無煩無惱就誠滿足矣，欲閣求按怎？毋過到這陣，時代變甲完全無全矣，大多數的人干焦食穿無煩惱是無夠額的。有的人食、穿、用項項都欲恰人比並，「慾望」這個新詞就按呢出現矣。

講著「慾望」就予我想起當年咧讀大學的時陣，有一位經濟系的朋友就共我提起這個詞，閣落一段個教授放的孔子白予我聽，講：「在人世之間，生不足之感，感不足而欲滿不足感之感也，謂之慾望。」拆白講就是：「人生在世，先有無滿足的感覺，閣再來就是欲共這個無滿足感的欠缺添補起來的一種感覺。」

1954年，美國一位真出名的社會心理學家 Maslow (1908-1970)，頭一擺提出人類需求的理論，照層次懸低分做下面五類：

- 一、生理需求：就是對追求食、穿、躑、用的滿足。
- 二、安全需求：保障家己、事業恰財產的安全。
- 三、社會需求：指生理恰心理上的親情恰友情的需要。
- 四、尊重需求：追求個人的成就恰社會的認同感。
- 五、自我實現的需求：包含個人的名聲、地位恰財富。

因為時代的變遷，世界人口結構的改變，每一種需求已經有真大的變化。雖罔有缺少的學者提出恰伊無全的看法，毋過 Maslow 的理論猶是受著人事管理學這方面的重視。

咱一般人若講著需求，簡單來講可能就是「著愛」(英語是 must) 抑是「想欲」(英語是 want)。就親像腹肚枵著愛食飯，感覺會寒著愛穿衫這款的，是「袂使得無的」。啊若講著「想欲」當然嘛表示「無嘛會使得」。譬論講「想欲」食鮑魚恰魚翅；「想欲」去環遊世界；「想欲」做大官遮的。準講做袂到嘛袂按怎啊！敢毋是咧？

人的慾望是無底深坑，滿足一個慾望了後就會欲閣追求另外一個閣較懸階的慾望，一直追求落去。有人講這應該恰第三者誠有關係，因為人攏會想欲和人比並，毋但毋認輸，閣較愛贏別人。若準咱會當排除這款心態，無定著會較快得著滿足感，就較袂有遐爾濟的慾望，應該嘛會較快樂才著。

作者：陳憲國

☆詞彙學習☆

【向時】hiàng-sî：往昔。

【無夠額】bô-kàu-giáh：不夠的。

【比並】pí-phīng：相比較。

【落】làu：炫耀語言能力。

【放】pàng：說大話。

【孔子白】khóng-tsú-pèh：文言文。

【拆白】thiah-pèh：挑明。

【著愛】tiòh-ài：必須。

【想欲】siunn-beh：想要。

【譬論講】phì-lùn-kóng：比方說。

【敢毋是】kám m̄ sī：難道不是？